

四庫全書

集部

欽定四庫全書

石倉歷代詩選卷四百八十九

明 曹學佺 編

明詩次集一百二十三

謝復

題竹隱軒

主人好瀟灑閒情寄脩竹
共此歲寒心深潛媚幽獨
日倚闌干清風滿林谷

水碓夜鳴

荆玉渺夷曠家家事生業中有濟世人臨流安野碓截
竹駕迴輪六月洒飛雪春出萬斛珠搗碎一溪月達旦
凡幾周循環聲哽咽洗甌具晨炊鼓腹頌洋溢

南山別墅

主人昔未貴愛此南山幽結廬傍山曲遶屋皆良疇時
復事東作呼童飯其牛扣角一長歌起慰蒼生憂藍田
美丘壑且為高情留晚歲心境會雲水同悠悠

林下清風

松竹遠吾廬，戶庭匝繁陰。耽此日幽雅，而無塵鞅侵。好風天際來，予以滌煩襟。花鳥有深契，泉石諧知音。有時發天籟，妙合無絃琴。上憶千載人，朗然恣孤吟。

東山

繫我書屋東，屹然矗高峯。壁立幾千仞，卷舒簇芙蓉。巉然頗高潔，緬懷太傅翁。明月墜西嶺，白雲散晴空。雖無薔薇洞，而有竹與松。捫蘿試攀援，着屐扶短筇。千古重

先德何由躡孤蹤

西巖

鑿石通西巖巖深石不裂中有散髮人於此避名世朝
朝汲寒泉夜夜卧明月時復棹孤舟披簑釣江雪

石室

維石何巖巖壯此南山居主人好瀟洒鑿石以為廬六月貯
冰雪清風拂襟裾如遊廣寒宮嚼彼冰玉珠掃石坐清蔭欣
然讀我書席地酣吾睡雲深夢蘊蘊遂我熙皞志上與無懷俱

十里碑歸後作

吾衰倦行邁動履如老翁
仲冬風日佳偶出墟曲中
田家具雞黍盃酒話從容
穩步度危石緩行經怪松
菜田鬱青翠麥隴亦蔥茸
興盡賦歸去亂山殘照紅

攜夢兒同王澤寓重興院書文醉中賦此

亢陽日為虐携子招提遊
頗解文字飲主賓相勸酬
四紀駒過隙廢興慨前脩
頽然北窻卧竹樹涵新秋
濡毫一揮洒涼颼雨颼颼
薄暮酣且歌緩步歸林丘

雪中

東皇失其御十日無精光
膝六驅前鋒迴風恣清狂
晨光炫銀海簷滴更漏長
我髮日已白對此重感傷
披氅學王恭展卷懷孫康
哀彼下土人大半虧衣糧
履敝東郭跣門閉袁安僵
願言早開霽萬象熙春陽

石厓為古歛劉彥實賦

寒空峙崔嵬壁立幾萬仞
秋高月影清雨過嵐光潤
丹青出天巧錦繡古苔絢
過者不可攀引領極高峻
下有

同心人飽歷風霜境抱此剛介姿梯雲騁豪俊意氣凌
蒼冥摩厓吐餘論

牛山眠月栗里八景之一為王懋元題

伊誰破混沌盤根據坤輿嶄然露頭角肖像躬犁鋤落
日下空谷藉草明月孤山風起林末過者聞鼾呼居人
事耕稼對此空躊躇

味菜軒

簞門有高士汪汪君子儒雅志尚清素此心常泊如采

采園中蔬欣然讀我書是中有真味於以還其初嗟彼
膏粱徒邈哉天壤殊

暘谷樵遊

東方有佳士寅賓宅嵎夷晨光啟蒙昧萬象含清輝間
闕林中鳥時復翔高枝忽聞丁丁聲和鳴應雄雌歸去
日將夕聊以備晨炊富貴非吾願神仙不可期陶然醉
春酒細和伐木詩此中有真意欲賦難為詞

侍家君南湖監稻

微霜十月初西風下林葉適此玄玉戾朱光慘餘烈于
焉課農獲袒裼汗流浹坐樹垂清涼臨流就涓潔鵲噪
萬年枝下上呼接接吾翁八十餘扶老暫流憩田家載
酒來雞黍互羅列孫曾同起居僮僕供使役薄暮歌式
微鼓枻弄殘月

尚古

伊誰破混沌鴻荒但茫然構木押林羽汙尊掬寒泉去
古日已遠誰復談羲軒敞也垂妙齡乃爾追古先蕩蕩

沂無懷熙熙游葛天我生千古後欲寫難具言長揖謝
世人振衣西山巔寄言我宗子無為俗所牽敦本豈獨
羨徇名叢衆嫌歲月不我與孜孜期勉旃

題栗里王懋元別號雪崖

歷峯鬱蹇我芙蓉削空碧蜿蜒東北來峻峻屹孤壁秋
高風色寒積雪凝不釋猿猱那敢攀下有王子宅卓彼
梅磴孫繼志尚貞白揭扁當座隅予以勵朝夕時復披
皇墳清光滿書席夢遠瓊瑤臺不假登山屐神遊千仞

岡安用翔風翻塵世何茫茫邈矣天壤隔

西原

出郭窮西原行行迷遠近陟嶺如升天下嶺如入井綠
樹道上陰青山水中影我來日已深未覺成幽隱清風
洒塵巾明月照孤枕時復採黃花微吟弄秋景

沼上芙蓉花盛開

美人靚粧照秋水半醉香腮睡初起嬌媚不知桃杏姿
歡娛慣與幽人期幽人愛汝顏色好寂寞空山得偕老

芳洲烟樹

沙頭二水分東西樹影橫斜高復低輕烟籠絡半隱見
逕路無媒春草萋老人一望眼無力倚杖花間聞鳥啼
何如呼酒對鷗鷺寵辱都從醉後迷

西莊清隱

西莊先生愛幽獨買斷青山結茅屋一犁春雨耕白雲
幾曲斜陽飯黃犢吁嗟世事徒紛紛先生有耳若不聞
門前松菊自成趣傍人笑指陶徵君

車田放歌

車田乃九世祖禧年公墓所附
墓先大父顗一公及先伯于此

車田四面鬱松栢高塚累累復誰在歲時伏臘子與孫
持酒還過墓前拜殷勤拜罷行且遊平沙浩浩白滿洲
下有寒潭幾千尺一天明月澄高秋清溪幾處抱村曲
上有幽蘭間修竹谷口南望橫翠屏綠玉參差香馥郁
岡頭古栢不記年至今黛色猶參天鬼神守護非常物
白雪前山相對眠

高湖行樂

高郵佳麗東南州
主人家住湖上頭
烟波浩蕩渺無際
綠楊芳草春悠悠
波紋浪殼鏡中影
春風載酒盟輕鷗
人生南北幾來去
四海弟兄同勝遊
君懷洒落不可狀
夕陽簫鼓鳴蘭舟
東門黃犬華亭鶴
榮辱不驚垂釣鉤
我閒為君寫心曲
臨風一嘯歌滄洲

西梁月夜懷李白

東有梁西有梁
中流一去何茫茫
多少翰林風月夜
都歸采石雄文章
雪水翻大江
雲山杳清絕
呼起謫仙人

舉杯弄明月月行與我還相隨仙人不來我何為

客裏

客裏度長夏中宵懷故丘月明梧葉露風動竹林秋心
跡淡如洗年光真似流無由出塵表獨立萬端憂

晚遊後坊山

薄暮後坊遊憑詩遣旅愁雲藏孤徑暝雨過萬山秋為
客身無恙登高興未休平生耽野趣舍此更何求

即事

哀疾朝慵起荆扉晝始開雲閒不飛去鳥倦却知回果
熟從人摘松疎擬復栽狂歌白日暮誰與詠歸來

春日偶成

二月春光好村村景物賒綠垂烟外柳紅綻雨中花倚
杖登危嶠提壺坐淺沙萬緣知有分隨處即為家

車田阻雨

松栢車田路無人問索居青氈懷舊物黃卷接新書暝
色春愁外棋聲午夢餘相看諸阮在風雨共茅廬

遊南山原

青春已歸去佳景際清和雨後羣峯出林間一鳥過寸
心宜澹泊萬事任蹉跎雲塢期深入薰風引興多

西莊

處處風光好村村景物新雨晴鶯首夏鳥弄憶餘春白
屋新居士青山舊主人重來如昨日相對不知貧

拜西莊先隴

一徑通幽谷吾家六世阡草深垂曉露松老掛寒烟山

色晴嵐外溪聲亂石邊殷勤酌新酒未滴已潸然

山家即事

野外渾無事年豐即太平樹陰隨日轉嵐氣共秋清犬
熟客不吠牛閒人罷耕眼前皆好趣物物助詩情

簡千戶侯某

得食將軍第飄然喜欲狂壓爐新炭火釀酒舊林香苦
雨山還雪凌寒菊自霜以君多慷慨何處共連床

寄浮梁朱志高

一自分襟後星霜四載餘望迷春樹暗夢落曉鐘疎松
栢凌寒秀芙蓉向晚舒禮編承舊諾何日賁吾廬

蓬菴

一室蕭疎甚幽人此卜居緒風穿隙慣漏月射窻虛農
事春耕雨齋心夜讀書明時多玉帛門外駐安車

幽居

幽居塵事少到處幸年豐夜雨時聽竹寒烟曉看松牛
眠青草坂樵唱白雲中田父遙相迓開樽一笑同

暮春懷本厚西峰讀書

雨水連三月春光又一年
鶯花猶怯冷雲樹迥遮天
幢影浮燈外鐘聲落枕邊
憐君讀書處寂寞似枯禪

過東武陵嶺

野服侵寒露籃輿駕曙烟
到頭分縣界隨處出源泉
疊石垣為屋開山嶺作田
平原迷近遠永泰正秋天

題趙子昂蘇武牧羊圖

誰寫漢中郎風流趙子昂
雪中持漢節海上牧羊氣

與風霜勁忠爭日月光君為宋家子揮翰亦堪傷

送蘇令君二季還衡水

二美吾侯弟聯轡此暫遊望雲懷故國乘月促歸舟紅
葉清霜候黃花細雨秋祁人憐遠別相送暮江頭

秋日田家留飲

田翁具雞黍細酌掩柴扉白雪翻匙軟黃金着筋肥秋
風正搖落寒日轉霏微老去渾無事醺然薄暮歸

過西鄰汪氏山居

幽居寡人事瀟洒出塵氛綠竹千竿雨蒼梧一片雲雜
花隨地有好鳥隔窻聞六月渾無暑餘清幸見分

賀蘭軒先生移居

移居向城郭築室號蘭軒藥熟香生白詩成酒滿樽但
令心地遠不覺市塵喧我屋西山下相過莫憚煩

山居

我愛山居好悠然野興賒接簷藤覆瓦漏壁水穿沙挑
菜時供饌分泉夜煮茶田家無雜語閒坐話桑麻

閒中偶書

幽居少塵事，愜我究遺經。
水色涵空碧，山光過雨青。
游魚出復沒，野鳥去還停。
得失無心計，從人笑獨醒。

寓居偶書

舊業隨烟燼，浮生類轉蓬。
清風一林竹，明月幾株松。
村北偏擔嶺，溪南卓筆峯。
老親垂九十，小子亦成翁。

重造小屋適有攜故人胡寧壽草書見惠

松竹西山下，清風一草廬。
經營終歲計，邂逅故人書。
珠

玉聯今古雲烟妙卷舒不妨高掛起舉首對羣儒

南塘散步

雨晴春欲半行色踏青忙種竹占榮悴看松試短長梅
殘蜂戀樹水暖鷺窺塘獨念池邊藕抽錢未作行

寄方平陽

我愛平陽令彈琴不下堂詩成無吏報春及有農忙種
柳枝枝碧栽蒲節節香三年應報政烏舄看高翔

冬日陪春雨諸公流山原看山

厓石千重險籃輿一逕穿黃雲迷曉日綠樹鎖寒烟水
陡斜還屈山深斷復連是有真意何必話綿綿

新春雪中試筆

漠漠隨風轉飄飄着地輕喜從殘臘至愁向早春生梅
冷添新白山寒失舊青農家占歲事日日試陰晴

酬王懋元見寄

相別未旬日相思如一年憐君舊知己寄我新詩篇旅
館孤燈夜炎憲六月天遙知讀書罷風雨對愁眠

南塘感懷

野老幽棲地微茫烟霧開風生採樵徑日上釣魚臺入
谷聞啼鳥臨池見早梅獨憐荆棘底萱草委荒苔

祠中即景言懷

夏日經行處時聞啼鳥聲桐餘幾枝白秧刺半田青雜
樹團清蔭來年報小成虛堂共僧話相對兩忘情

即事書懷

徑路無媒畫掩扉野情真與世相違老梅着雨半黃落

乳燕遶梁初學飛
草色入簾青似染
槐陰夾道綠成圍
半吟半醉日西去
閒伴白雲眠翠微

秋興

茅屋柴門老樹村
樵歌牧唱自成羣
一溪紅葉隨流水
萬疊青山隱白雲
人跡過橋霜後見
猿聲嘯月夜深聞
自憐到處棲身好
野飯加飧酒半醺

半仙亭

悟得仙鄉在眼前
桃花隨處竟悠然
舊時卜築幽棲地

今日翻成小洞天
饑採松花和露食
困臨苔磴伴雲眠
回頭白鶴閒相語
若道非仙却是仙

遊茶培坑

秋風隨步訪晴蘿
山路泥乾處處過
霜葉絢林明晝錦
凍泉吟石奏雲和
書程有課閒時促
詩興無端醉後歌
却笑幽禽自來去
不知人在碧山阿

寓理堂庵

春風信宿碧雲居
佳境天然與世違
林鶴曉衝松露出

山僧夜趁月明歸，開樽細勸臨花砌。
對榻長吟掩竹扉，多少真情難畫處。
相看幾度憶王維。

題邑宰穀山王先生冊

令君為政尚無為，一曲瑤琴對翠微。
晝靜山禽下廳事，夜深村犬卧柴扉。
桑林春綠驚蠶早，草色秋黃愛犢肥。
何事王喬雙舄去，乘時應傍五雲飛。

寄題寒谷山房

清溪斜遶北山頭，偶愛溪山卜築幽。
啼鳥有時供笑語，

浴鷗無數對沉浮春寒歌枕驚殘夢夜靜評詩憶舊遊
安得移居近君側醉吟隨意共悠悠

勞初誕孫

忽忽明年是五旬阿孫初誕慰情真貽謀謾自安吾拙
計口從人笑食貧著草效靈符吉夢蘭芽茁秀占先春
高堂況復添康健白髮相看四代人

遊青蘿岩簡同行汪陳二知己

不到青蘿三十年重臨風景尚依然乳泉細滴晴簷雨

石室聯開小洞天，烏道半通苔已沒。
鐵崖中斷樹相連，評詩搗坐忘歸去。
恨不移家共醉眠。

次過徽嶺韻

直指風聲已早傳，山城到日屬霜天。
行經驛路峯巒秀，坐對寒崖瀑布懸。
聖世昇平無諫疏，王程清暇有詩聯。
飛騰此去中天近，藤刺何緣作意纏。

南塘偶書

世路驅馳阻且長，林泉隨分寄疎狂。
青山半掩雲歸洞，

白鳥雙飛水滿塘
脩竹每便三徑靜
清風獨占北窗涼
人生得意須行樂
天地無情兩鬢霜

奉題家君別號太古

無辱無榮物外身
不貪富貴不愁貧
恥言秦漢年間事
自謂羲皇世上人
利害一生忘計較
混沌千古復真淳
膝前自有嬰兒戲
暝坐東風日日春

題硯田

剗却端溪勢坦然
耕雲常近士林邊
一方玄玉無多地

幾點金星不在天
毛穎荷鋤分勺水
松滋負耒試寒烟
憑君收拾歸方寸
留與兒孫世世傳

代東本厚覓蕨粉

蕨粉由來味最嘉
常呼纖手試金芽
杓分新澗流雲液
杵帶殘星搗月華
細嚼水晶圓更滑
閒抄晴雪淨無瑕
何人會得先生意
早晚前村興易賒

祠中偶題

松風庭院晝沉沉
頗愜浮生習靜心
童子曬書隨日轉

老僧分榻卧雲深
滿前生意新
栽樹幾曲鳴聲久
住禽萬物於吾同一體
閒中收拾付清吟

夏大水

冥冥十日雨
浩浩勢襄陵
曠野洞庭闊
平疇滄海深
魚龍迷故宅
鳥雀覓高林
出壑玄蛟舞
凌波小舸沉
夾山田變谷
虛市米增金
野哭聞人溺
樓居怕水侵
此情誰與訴
搔首獨長吟

山行

興來出門去一出澹忘歸山鳥識人意殷勤來去飛

聞砧

小窻寒夜靜愜我讀書聲為問閨中月誰家夜搗砧

板石坑

混沌誰鑿開萬象森以朗山高水自深中有石如板

毘陵夜歸

野曠人烟散田稠雜產稀石橋流水緩江舸月明歸

宿七里砦

明月孤舟夜清江七里磬誰憐遠遊子寂寞卧秋風

過分界山

兩縣中分界孤舟逆上灘綠陰巖下石知是歛南山

秋香逕

山氣秋更清山花秋亦好芳馨襲人衣俯首拾瑤草

茶坂

一望渺何許簇簇黃金芽春罌煮殘雪詩興清無涯

山庭午坐

亭子依山構行人此息肩坐忘清晝永聊枕綠陰眠

玄灣霽月

玄雲杳無跡灣水尚漫漫山月一何皎流光泝急湍

芙蓉

桃李競春華年年逐風雨寧似江上花清光照秋水

夜愁光陰易過學問不進記以絕句

炎天過却復秋天容易蹉跎又一年終日客窗愁不撩

短檠隨意翫遺編

懷舊

江空漠漠水雲平千里歸舟一葉輕
記得小波三度興
五更燈火讀書聲

即事遣懷

古木參差石逕斜日長無事似僧家
更憐地僻經過少
省得人行楚落花

返景德鎮懷徵士先生舊遊

兩岸斜風萬竈烟數聲柔櫓夕陽天
江空月落人何處

琴劍東遊憶往年

題楊原耕舍

誅茅遠結白雲間
屋下清泉屋上山
南畝一犁春雨後
數聲啼鳥夢中間

宿板子磯橐

過却磯頭又一年
移船相近夜投安
數星野火寒蘆外
知是誰家隔岸山

秋意

西風吹動客邊秋散作遊人鬢上愁惟有堦前明月好
夜深相對仲宣樓

遊虎丘山

輓轡方并劍池幽石逕縈紆入虎丘試上高樓一回首
滿城烟樹是蘇州

八月見梨花

竹外尋詩一逕斜山園八月見梨花近來無限悲秋意
愁對西風詠物華

雪影

一色瓊瑤太素餘清光斜射碧窻虛寒爐撥盡孤燈滅
曾照幽人夜讀書

芙蓉花開

年來隨地覓花栽歷盡東風總未開惟有寒花憐寂寞
晚粧微露水紅腮

南塘秋望

一池寒碧浴晴空滿眼秋光夕照濃又見桃花紅兩度

嫣然含笑妬芙蓉

塔山八景為方君憫題

花萼樓前白玉枝
暗香長與月相隨
草堂人去逋仙老
春興無端却屬誰

幽逕無塵碧蘚迷
桐君隨我踏香泥
梅花落盡南飛鶴
彈到無聲月正西

十月十六日南塘對菊

一種幽芳南澗濱
天然玉質迥無塵
寒香不逐西風去

時伴東君媚小春

二月二日入山看松竹值梅花盛開

閒因松竹陟嶙峋松已成陰竹未勻好是梅花助詩興
兩株晴雪不勝春

祠堂暮歸

松竹連陰古寺傍解衣閒坐就清涼微吟緩步歸來晚
處處山蟬送夕陽

首夏山行即事

水滿寒塘一望平
野花香裏踏新晴
青林一簇南薰細
時送黃鸝三雨聲

石倉歷代詩選卷四百八十九

欽定四庫全書

石倉歷代詩選卷四百九十

明 曹學佺 編

明詩次集一百二十四

史鑑

丙午歲予初度題像

自我得爾來忽忽已三載憂樂不相關貧病安能浼茲辰
遇初度舉酒一相灑我貌日就衰爾顏長不改過此復幾

時應知愈不逮觀者問為誰曰我咸疑給惟餘舊親識追
想為爾拜茫茫天地間歲月不相待終當委運去誰亡復
誰在謂是無所知言非亦何解一笑兩茫然浮萍渺滄海

過梅花道人墓

問津武塘下攬衣獨吟行徘徊古道旁纍然見孤塋荆
榛竄狐兔牧豎時來登橡樹半無枝曲池猶未平哀哉
梅花庵一仆不復興空留水墨蹤允為後世程高風董
巨間不復名丹青古碑無文章但銘卒與生生前徇名

教豈樂浮屠名時非有深識季世多兵爭愚人信因果
庶幾保其形同時富豪家厚葬侔山陵毀盜殆無餘遺
骸縱復橫珠柙去已久蔓草來相縈何如一抔下晏然
無震驚取重亮在人信非山水靈采芳薦清醑日落風
悲鳴遙遙望遐躅感嘆有餘情

殺虎詞

城西之山舊無虎草淺林疎少依阻白日咆哮忽見之
橫行食人難指數官兵捕虎爭負戈上下林谷交張羅

一虎跳梁忽驚潰何況衆口騰其多怒視眈眈猶負嵎
山民櫻之春以炙黃斑紛披血膏野相與屠戮殘其軀
嗚呼養兵資禦侮見虎何為怯無武龍沙茫茫天四垂
走馬胡兒猛於虎君不見肉食乘軒將門子遇敵幾人
能致死

畫馬歌

房星之精化為馬肉駿連錢滿天下世俗寧知驥與駑
善相方臯一何寡君看畫馬自有真能通相法方入神

驪黃牝牡不足辯天機內解斯其人騰驤飲翫逐水草筆
端幻出龍駒島雄姿矯矯長風生逸氣稜稜飛電掃老眼
摩挲忽驚起便欲驅之涉長道君不見韓曹已往不復生
吳興死後無丹青天閑龍媒十萬匹誰能起之圖爾形

秦淮歌

停君金叵羅聽我秦淮歌長江西來幾千里沿洄直入
臺城裏浮青蕩綠南北流至今猶號秦淮水秦淮之水
能容舟秦淮之上花滿樓美人捲簾垂玉鈎太白仙人

清夜遊酒酣乘月往石頭棹歌渡淮水倒披紫綺裘英
風撼五岳豪氣隘九州通來四千九十五甲子無人繼
此移山倒海之風流水光依然月如故斷雲零落令人
愁豈無清歌與美酒與子碌碌誠堪羞我歌秦淮歌送
君秦淮去城西酒樓在何處主人今非舊滌楚且須痛
飲歌達曙達曙歌醉方寢笑壓吳姬股為枕滿身模糊
覆宮錦明年我亦泛秦淮手解金龜就君飲

題可菴老人寫竹

國初寫竹王舍人筆端生動妙入神風流太常繼其後
片紙一出人爭取可菴老人得此傳聲價在人尤赫然
江南賢豪動百數家家屏障生風煙前年寄我雪竹圖
天地黯慘雲模糊大枝橫斜小枝亞金鞭擊折青珊瑚
今年寫竹吳江縣寫出千人萬人羨鸞鳳盤空雲日翻
蛟龍出海風雷變鷓鴣無聲錦瑟稀湘娥披雲未遮面
老人老人勿自珍筆力轉多方絕倫高山流水志有在
莫謂識曲無其人

過橫塘

西向橫塘過風涼天又晴兩山沿路轉一舸問津行野
水飛雲度斜陽去鳥明采蓮人不見遙聽唱歌聲

中秋聞諸弟宴集湖上有作

樂事愁邊減流年客裏過桂香秋色重天迴月明多欲
共嫦娥語其如良夜何遙知湖上飲達曙尚酣歌

送漁隱母舅

十年纔一見離合動悲傷投壁投河水驅車入渭陽青

山明夕照黃菊款秋光莫惜頻來過慈親鬢已霜

樂清寺

未老成歸計房開祇樹林青山塵外相明月定中心近
水行秋影焚香坐夜深世人尋不見惟聽海潮音

將遊金陵夜泊震澤

朝飲平湖酒宵停震澤航從茲登遠道猶未出吾疆月
隱星光爛花穠露氣香路人初不識笑問客何方

元日

流年今六十壯志日蹉跎得此已為幸更來能幾何青
山遊未徧白髮在無多去去不須道逢春且嘯歌

贈金本清舍人

少將詞賦繼班揚館閣周爰歲月長朝罷讀書天上詔
使歸那有橐中裝齊棺古隸先秦出岐鼓遺文後世光
乞得鑑湖三十里四明原是賀公鄉

寄震澤道士沈長春

春風歸騎柳邊停一上仙臺思杳冥苔水遠從天目下

弁山長繞太湖青
片雲孤鶴吹笙度
千樹啼鶯把酒聽
最愛籠鵝能好客
無人援筆寫黃庭

吳元玉招賞牡丹以無都扶圖呼為韻

洛陽花事久應無
勝賞今逢在舊都
春色祇緣人自惜
哀顏還藉酒相扶
時無永叔誰重譜
座有徐熙合寫圖
夜靜更持紅燭看
滿庭如畫鳥鶯呼

遊勝果寺

天地茫茫幾廢興
中峯依舊有巖亭
江流到海逢潮轉

山勢如城遠寺青仙洞隔花春寂寂野雲將雨樹冥冥
幽禽似惜韶光暮頻喚提壺笑客醒

松陵夜泊

城陰分手即天涯嶺樹江雲別路賒未到故園猶自客
忽聞鄉語似還家燈前今夜愁無寐鏡裏明朝鬢有華
欲問歸舟何處泊月明和鴈宿蘆花

送嵇揮使還長安

落花時節子規啼中散還鄉馬首西漢苑別來為日久

秦川行到覺天低
雲程遠見三春鴈
關法今無半夜雞
不獨銷魂灞橋上
闔閭城外亦淒淒

送人遊維揚

憐君失意向天涯
雨歇紅亭日已斜
對酒不須嗟往事
渡江知是客誰家
孤城猶繫揚州郡
四海空傳后土花
莫過雷塘吊陳迹
只今殘柳尚啼鴉

登吳興慈感寺閣

亭亭高閣倚斜暉
廿載曾從此地歸
往事已隨春草換

重來似覺故人稀
孤城近水青山映
遠樹連雲去鳥微
欲繫扁舟嗟未得
蘼蕪新綠釣魚磯

曹顥若載酒過訪以詩贈別

一樽相對思依依
老大空悲始願違
華髮鏡中看漸短
故人天際信來稀
黃梅雨少河流淺
綠樹陰多日景微
欲把漁竿江海上
却愁風浪濕荷衣

清暑處

激水四簷鳴
常如風雨聲
不須秋節至
紈扇已無情

題陳希夷睡圖

世事紛紛奕棋蓮花峯下睡多時春風引入華胥國
忘却浮生在亂離

寄吳鳴翰湖上二首

紅塵不到三山遠家住蓬壺鏡裏天隔浦落花雙屐雨
過門流水一溪烟

多時不到南湖上花落鶯啼又一年有約畫船同載酒
短篷春雨看鷗眠

醉題西朶壁

西風蕭蕭吹客衣黃溪道上行人歸一聲長笛起天外
白雲滿山霜葉飛

題和靖觀梅

孤山山下斷橋邊萬樹含香雪後天我亦騎驢來弔古
夕陽荒塚寺門前

題許子厚扇

好山多在石湖西草色新年綠未齊亭子半開脩竹裏

一簾春雨鷓鴣啼

可閒

鈎簾把酒對青山老境無求始是閒
請看春波門外水
年光流去幾時還

題啟南松陵別意

芙蓉秋水照雙旌
冠蓋紛紛出送行
見畫不堪傷往事
冷風和雨過江城

偶成

一年春事已闌珊
天意應於好景慳
落盡桃花終日雨
逢人空自說遊山

斷橋分手圖

近水人家半掩扉
兩山樓閣尚斜暉
斷橋無數垂楊柳
總被遊人折漸稀

海鹽張方洲太守遠慰予室燬臨行贈此

舉目淒然百感侵
敗垣殘礎燒痕深
流鶯似惜人顛顚
未及花時送好音

和答吳廷暉

一春多雨更多風，猶有殘花茂草中。
縱使君來不堪賞，冷香和露泣微紅。

寄杭州友人

西湖湖上水初生，重疊青山接郡城。
記得扁舟載春酒，滿身花影聽啼鶯。

徐霖

字子仁，吳郡人。
僑居白下。

遊天闕山

城南天闕山平遠易登躡正如大君子優容後生接維
時春未深衆木始抽葉諦觀巖壑姿青蒼入眉睫况無
蛇虎患奮往心不怯賴僧導所如得以恣周涉方苦步
遲頓忽驚去輕捷若或有神助益復忘疲繭蔬荀聊一
飽自幸游意愜哦詩下山去野鷗迎笑靨

遊西湖

西湖如明鏡諸山若美人美人照明鏡形影兩能真歌
聲何處來山鳥解鳴春飛花舞當筵布作錦繡裯可惜

無畫手能為景傳神所賴有詩酒陶寫風物新一賞詎
云足安得日相親

酌中泠泉

入遊山水窟得酌第一泉海門在何處莫能窮其源俯
瞰江兩岸天上與人間即欲乘剛風此意向誰言

九華山

隔江望九華九朵青蓮開高下插穹影晶英招欲來誰
能易佳名除是謫仙才題詠似簡易一語萬象該後人

詫能賦贅語徒喧喧
安得起九京共此風月杯
歸心不可遏翹首共徘徊

遊牛頭山

肩輿去兀兀冒冷陟高原
仰睇牛頭山蒼翠籠雲烟
十年乖茲遊慕意恒懸懸
今辰喜酌願如渴獲飲川
入寺撫舊景不覺增留連
蔬供易厭厭深謝老衲延
哀颯恃強健直上山之巔
勃發少年興未了塵世緣
買田偶近此何妨日盤旋
自詫離城市遂得娛林泉
理數有乘除

寒灰火復然從當戒昏飲長齋繡佛前

遊虎丘山

出城山在眼路近便遊人稍攬巖巒秀全祛朝市塵流
泉鏘珮玉殘雪簌嶙峋任我躋攀去毋辭哀倦身

其二

老去他無嗜登山興未厭酒緣隨俗混詩思為僧添凍
鳥自高樹寒梅或背簷彼皆欣有託笑我異鄉淹

昭慶寺

寺內尋幽勝躋攀興轉豪空廊塵壁暗古殿戒壇高禪
味誰真悟形骸自作勞無文來發願雙鬢愧刁騷

過臨清微雨

迢遞還家路纔過第一津無詩便覺俗有酒未為貧願
足凝塵席年驚下坂輪吾方苦炎熱雨脚助精神

夜汎陽湖

中宵息羣動一艇汎湖東天上清秋月人間白髮翁魚
龍休鼓浪荇藻任牽風不是乘槎者銀河豈得通

旅次除夕

已自悲年逝何堪在異鄉紅燈照影獨白髮為愁長友
助椒觴味隣傳术火香無眠守寒夜簡點舊行藏

牛首山

冒熱登臨不憚勞哀年尤比少年豪霏霏雨洗青山路
蕩蕩風吹白葛袍某水某丘尋故境一觴一詠屬吾曹
杜門枯坐少行樂翻悔從前興未高

不到名山又幾年山中風景但依然佛廬清淨此何地

僊窟幽深別有天
頗怪松陰穿黠鼠
俄驚石竇響流泉
未須斗酒添詩興
要與茲山結勝緣

浮山

慕山雖恨到山遲
喜共山靈有夙期
景在石龕逢衲處
趣增田舍訪農時
年華催老閒方覺
酒醺消憂隱獨宜
酷暑惱人難避得
煩襟正愛午風吹

西山

此山名顯是何年
我得來遊豈偶然
樹木陰濃迷白晝

樓臺勢聳插青天，心貪便擬移家住。
足嬾何妨借榻眠，衰老未消豪壯氣。
還乘酒力了詩緣。

北固山

丹崖青壁畫難如，勢壓中流接太虛。
鐵鑊尚存梁代物，寺門猶榜宋人書。
遙看暝浦輕鷗下，漸惜秋林落葉疎。
欲了此中遊樂興，直須長住混樵漁。

初過西湖

兀坐肩輿恣嘯歌，遠尋蕭寺繞陂陀。
生憎勝地人遊少。

不分名山僧占多
六代跡空湮
草莽諸天界
祇隔藤蘿
躋攀未竟日
已暮幽獨傷神可奈何

姚原白招賞百合花

名園爭賞異花開
為愛幽芬遠俗埃
地主好陳青玉案
花神故獻鬱金杯
偶驚明月端陽至
恠得閒門詞客來
小雨初晴新月朗
不妨移席重徘徊

舟中除夕

去年淮北逢今夕
今夕湖南憶去年
歲月於人情不斷

山川容我夢相牽
數巡清酒春開甕
一點紅燈雪滿船
莫向梅花問消息
東風回首益悽然

西溪對月

海鄉今夕正思家
况復悲秋對月華
萬客舟航依野草
一天風露滿汀花
無情歌吹聲偏近
有約佳人路轉賒
忽憶秦淮烟水岸
那能此地久生涯

戲作贈客

臨行還贈繞朝鞭
且駐驕驄入市眠
十隊紅粧春壓酒

百枝銀燭夜燒筵留人最好逢今雨離恨從知是各天
莫向幔亭尋幻跡我曹元不讓神仙

桐城歸舟漫興

老翁七十未媿閒浩淼江程去復還覽鏡愧難留黑髮
當杯狂欲醉青山仰窺鵬鷄雲霄上近狎烏鷺洲渚間
誰謂衰年全省事獨於詩興不曾慙

孱體經秋已強支况禁風颺鬢絲絲忍看斷葦傷心處
正屬征鴻得意時畎畝終焉須有道江山如此可無詩

坐來猛覺飢腸熱且飽新炊雪滿匙

遊蓼莪


貪遊纔上蓼莪船小惺先叅下澤禪丘壑容人酬醉興
架裝與我結詩緣欣當惠遠今開社怪得坡翁舊買田
賞興未終愁即返半航斜日起湖烟

春日漫興

莫厭春來風雨天
最堪供給老人眠
出門節序驚百五
探囊酒資拚十千

墨芙蓉

慘淡秋光不自禁
臨風多少欲開心
城中桃李笙歌地
誰問寒江幾淺深



石倉歷代詩選卷四百九十